

Sumáriu Kazu
Tribunál Distritál Suai
Novembru 2021

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.
JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Suai

1. Totál kazu ne'ebé JSMP monitoriza :17

Artigu	Tipu Kazu	Númeru
Artigu 145 Kodigu Penal KP, no artigu 2,3, 35 Lei Kontra Violénsia Doméstika (LKVD)	Ofensa ba integridade fizika simples ho natureza violénsia domestika (artigu 2 kona-ba konseitu violénsia doméstika, artigu 3 kona-ba relasaun familia, artigu 35 kona-ba tipu krime violénsia doméstika no 36 kona-ba krime sira violensia doméstika nian hanesan krime publiku)	5
Artigu 138 KP, artigu 23,24 KP, artigu 2, 3 , 35 no Lei Kontra Violénsia Doméstika LKVD artigu 20 (1) (2 alinea f) Lei arma brankas	Tentativa omisídiu simples, arma brankas no forma violénsia doméstika	1
Artigu 271 KP no Artigu 316 KP.	Reseptasaun simples no kontrabandu	1
Artigu 260 KP, Artigu 259 KP no artigu 258 KP	Danu ho violénsia, danu agravadu no danu simples	1
Artigu 154 KP & Artigu 2,3 no 35 Lei Kontra Violénsia Doméstika LKVD	Maus-tratus ba kónjuje ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime violénsia doméstika no 36 kona-ba krime sira violénsia doméstika nian hanesan krime publiku)	1
Artigu 316 KP	Kontrabadu	1
Artigu 2 nu 1 letra (f) no	Pratika arte marsiais	1

Artigu 20 hosi Lei Nú 5/2017		
Artigu 258 KP no Artigu 157 KP.	Danu simples no ameasa	1
Artigu 1757, 1758, 1759, 1762, 1765, 1786, 1782, 1804, 1805 KS	Kazu ezersisiu poder paternál	1
Artigu 171 Nú 2 KP, artigu 2, 3, 35 no 36 LKVD.	Abuzu seksuál ba menór ho natureza violénsia doméstika	1
Artigu 259 KP	Danu agravadu	1
Artigu 145 KP, artigu 2, 3, 35 Lei Kontra Violénsia Doméstika LKVD no artigu 20 (1) (2 alinea f) Lei arma brankas	Ofensa ba integridade fizika simples ho natureza violénsia doméstika no arma brankas	1
Artigu 340 KPI	Omisídiu agravadu	1
Totál		17

2. Totál desizaun ne'ebé JSMP monitoriza: 14

Tipu pena	Artigu	Númeru
Suspensaun ba prizaun nia ezekusaun	Artigu 68 KP	5
Omologa		2
Absolve		1
Pena Multa	Artigu 67 KP	2
Pena Prizaun	Artigu 66 KP	1
Pena Multa no Absolve	Artigu 67 KP	1
Pena suspensaun no Absolve	Artigu 68 KP	1
Totál		13

3. Totál kazu sira ne'ebé adia tuir JSMP nia monitorizasaun: 0

4. Totál kazu sira ne'ebé sei kontinua tuir JSMP nia monitorizasaun: 4

B. Deskrisaun sumáriu ba desizaun kazu sira ne'ebé JSMP monitoriza

1. Krime ofensa ba integridade fizika simples ho natureza violénsia doméstika

Nú. Prosesu : 0006/20.CVSUI
Kompozisaun Tribunál : Singulár
Juis : Dr. Benjamin Barros

Prokuradór : Dr. Rafael Jeronimo Gusmão
Defeza : Dr. Domingos Dos Santos
Desizaun : Pena multa US60.00

Iha 11 Novembru 2021, Tribunál Distritál Suai prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu NB hasoru nia feen OC, iha Munisípiu Covalima.

Akuzasaun prokuradór

Prokuradór akuza katak iha 11 Janeiru 2020, iha oras tuku 12:00 meudia, arguidu foti ai-naton baku dala ida iha lezada nia ulun rezulta kanek ki'ik no dezmaia monu ba rai. Antes agresaun ne'e, lezada haruka arguidu atu ba taa bebak, maibé arguidu lakohi, nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu arguidu hili direito nonook. Enkuantu lezada kontinua konfirma faktu hotu iha akuzasaun no deklar katak di'ak malu ona ho lezada no to'o agora labaku ona lezada. to'o ohin loron.

Testemuña JG nu'udar viziñu, depoimenta katak iha akontesimentu ne'e testamuña haree arguidu kaer ai-naton baku lezada nia ulun no rezulta lezada monu ba rai, testemuña halai ba ajuda no lori lezada ba iha nia uma, depois lezada rasik mak ba ospital.

Alegasaun finál

Prokuradór haktuir katak mezmu arguidu hili direito nonook, maibé lezada kontinua konfirma faktu hotu iha akuzasaun no reforsa husi testemuña, nun'e prokuradór konsidera faktu hotu provadu. Tanba ne'e husu ba tribunál atu kondena arguidu ho pena prizaun tuir artigu 145 KP.

Entretantu defeza husu ba tribunál atu kondena arguidu ho pena suspensaun ne'ebé kmaan, mezmu arguidu hili direito nonook maibé iha produsaun ba prova lezada deklar katak di'ak malu ona no to'o agora arguidu labaku ona lezada.

Desizaun

Depoisde avalia faktu hotu, tribunál prova katak arguidu foti ai-naton baku dala ida iha lezada nia ulun rezulta kanek ki'ik no dezmaia monu ba rai.

Bazeia ba faktu provadu sira ne'e no tetu mós sirkuntasia hotu-hotu haleu krime ne'e, nune'e tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu US\$ 1.00 kada durante durante loron 60. Tribunál mós fiksa pena alternativa durante loron 40 prizaun, bainhira arguidu la selu pena multa refere.

2. Krime ofensa ba integridade fizika simples ho natureza violénsia doméstika no arma brankas

Nú. Prosesu : 0035/21. CVSUI
Kompozisaun Tribunál : Koletivu
Juis : Dra. Patricia de Araujo F. B. M. Xavier, Dr. Samuel da Costa Pacheco no Dr. Eusébio Xavier Victor
Prokuradór : Dr. Rafael Jeronimo Gusmão
Defeza : Dr. Fransisco Caitano Martins
Desizaun : Pena multa US\$ 45.00 no absolve

Iha 09 Novembru 2021, Tribunál Distritál Suai preside julgamentu leitura akordaun ba krime ofensa ba integridade fizika simples ho natureza violénsia doméstika no armas brankas envolve arguidu JAMA hasoru lezada/u MdS no MN, iha Munisípiu Covalima.

Akuzasaun prokuradór

Prokuradór akuza katak iha 20 Abril 2021, iha oras tuku 12:00 meiodia, arguidu husi uma lori kedas ho katana atu taa nia feen iha lezada/u sira nia uma, nune'e lezada MdS hadau katana husi arguidu, nune'e katana kona iha lezada MdS nia liman rezulta kanek no moras halo lezada hakilar, lezadu MN iha hela uma laran rona lezada hakilar sai mai hodi diskute malu ho arguidu, nune'e arguidu tuku dala ida iha lezadu MN nia tilun hun parte karuk rezulta moras durante loron rua. Kazu ne'e akontese tamba arguidu haruka ninia feen ho oan atu ba iha arguidu sira nia uma.

Prokuradór akuza arguidu kontra artigu 145 KP kona-ba ofensa ba itegridade fizika simples ho moldura penál tinan 3 ka multa, konjuga artigu 2, 3 (d) 35 (b) no 36 LKVD no artigu 20 (1) (2 alinea f) Lei Arma Brankas.

Produsaun ba prova sira

Iha prosesu julgamentu arguidu deklara katak faktu balun loos no balun la loos, arguidu deklara liután katak iha akontesimentu ne'e arguidu mensagem ba nia lezada/u atu haree nia oan no feen, nune'e arguidu ba iha lezada no lezadu nia uma, maibé lezada halai mai hadau katana nune'e katana monu no kona lezada nia liman. Arguidu la iha intensaun atu oho ninia feen maibé ba atu vizita de'it. Arguidu mós deklara katak sira kos iha Dili, maibé arguidu nia feen besik atu partus tanba ne'e sira ba Suai no hela ho nia banin sira, arguidu deklara katak kona-ba sosa hahan ne'e arguidu mós sosa no lezada/u mós sosa, mezmua hela ho nia banin maibé la depedensia ba sira. Arguidu deklara katak laos tan problema atu taa ninia feen ne'e maibé problema antes ne'e ho nia banin mane kona-ba fiu listrik nian, arguidu sai hosi uma ba hela fali ho ninia inan aman.

Enkuantu lezada MdS kontinua konfirma faktu hotu iha akuzasaun no deklara katak jarguidu ho nia feen mai hela hamutuk ne'e lezada ho nia laen mak tau matan ba sira.

Lezadu MN deklara katak kuñese arguidu hanesan mane foun no la perdua arguidu nia hahalok.

Alegasaun final

Prokuradór haktuir katak mezmu arguidu koko atu nega faktu balun, maibé lezada no lezadu konfirma faktu hotu iha akuzasaun nune'e prokuradór konsidera arguidu provadu komete krime hasoru lezada/u, nune'e husu ba tribunál atu kondena arguidu ho pena prizaun tinan ida suspende ba tinan ida. Enkuantu ba krime armas brankas husu ba tribunál fó justisa ba arguidu.

Entretantu defeza haktuir katak antes ne'e arguidu iha natar no haruka mensagem ba ninia feen Marsela no atu haree ninia feen ho oan, maibé banhira arguidu tesik ba sira nia uma lezada halai hasoru hadau katana hosi arguidu nia liman, nune'e katana monu kona iha lezada nia liman, kona ba krime ofensa integridade fizika simples forma violénsia doméstika, defeza entende katak arguidu la priense ba krime refere tanba tuir arguidu nia deklarasaun katak hela hamutuk ho lezada/u maibé arguidu mós sosa fós no sosa modo banhira lezadu no lezada la sosa, ba krime arma brankas husu ba tribunál atu halo alterasaun ba fali ofensa ba integridade fizika negligente no husu ba tribunál kondena arguidu tuir konviksaun tribunál nian.

Defeza ninia pedidu altersaun ne'e prokuradór mantein. Tribunál koletivu deklara katak deliberaun mak foin desidi.

Desizaun

depoisde avalia faktu hotu tribunál konsidera faktu ofensa integridade fizika simples ho forma violencia domestika hasoru lezadu ne'e provadu, maibé krime arma brankas tribunál konsidera la provadu tanba momentu arguidu husi to'os mai ho intensaun atu hasoru ninia oan no feen maibé lezada halai hasoru hadau katana no katana kona lezada nia liman.

Bazeia ba faktu provadu no la provadu, tribunál konklui prosesu ne'e no kondena arguidu ho pena multa US\$ 5.00 ne'ebé arguidu sei selu US\$0,50 kada loron durante loron 90. Tribunál mós fiksa pena alternativa durante loron 30 prizaun bainhira arguidu la kumpri pena multa refere. Enkuantu ba krime arma brankas tribunál absolve.

3. Krime tentativa omisídiu simples ho natureja violénsia doméstika no arma brankas

Nú.Prosesu	: 0001/21.CVFHR
Kompozisaun Tribunál	: Koletivu
Juis	: Dr. Benjamin Barros, Dr. Jose Maria Araújo no Dr. Naason Mário Armindo Marques Doutel
Prokuradór	: Dr. José Elo
Defeza	: Dr. Domingos dos Santos
Desizaun	: Pena prizaun tinan 6

Iha 09 Novembru 2021, Tribunál Distritál Suai prezide julgamentu leitura akordaun ba krime tentativa omisídiu simples ho natureza violénsia doméstika no arma brankas ne'ebé envolve arguidu DA hasoru lezadu EA (nu'udar arguidu nia primu), iha Munisípiu Covalima.

Akuzasaun prokuradór

Prokuradór akuza katak iha 30 Janeiru 2021, tuku 8:00 dadeer, arguidu diskuti malu ho nia aman hakiak kona-ba kami saku haat ne'ebé arguidu halibur hela iha uma. Hafoin dikusaun ne'e lezadu sai hosi uma mai iha liur hodi hase arguidu no hatete "*se ó lakoi fó kami ne'e ba apa, ó bele sai husi uma ne'e*", tuir mai arguidu la satisfeitu ho lezadu nia liafuan hirak ne'e, arguidu

diskuti malu fali ho lezadu no dehan “*ó selu tiha hau nia karau no osan mak hau sai kedan agora*”. Tuir mai lezadu mós resposta katak “*loos ona se ó hakarak selu ó nia karau no osan ó agora sai kedan*”, ho lezadu nia resposta ne’e arguidu hasai katana husi nia knuuk direitamente taa iha lezadu nia reen-toos, taa iha lezadu nia ulun parte loos, taa iha liman parte loos no taa iha ain parte loos, rezulta kanek no ran sai barak, hafoin ida ne’e lezadu halai tama ba uma laran depois sira nia aman mak hadau katana hosi arguidu nia liman. Tuir mai lezadu nia alin lori lezadu ba iha Sentru Saúde Fohorem no transporta kedas lezadu ba iha Ospital Referál Suai hodi simu assisténsia médiku.

Prokuradór akuza arguidu kontra artigu 138 KP kona-ba tentativa omisídiu simples ho moldura penál tinan 8 to’o tinan 20, artigu 23, 24 KP, konjuga ho artigu 2,3 (d), 35 (b) no 36 LKVD no artigu 1 (b), 2 (b), 20 Lei Armas Brankas.

Produsaun ba prova sira

Iha prosesu julgamentu arguidu hili direitu nonook. Enkuantu lezadu kontinua konfirma faktu hotu iha akuzasaun no deklarata katak durante semana ida halo tratamentu iha Ospital Referál Suai no gasta osan hamutuk US\$300.00. Lezadu mós deklarata katak ninia kanek parte reen-toos suku pontu 12, ulun parte loos suku ponte 19, liman suku pontu 5 no ain suku pontu 6. Lezadu deklarata liután katak agora dadaun ne’e kaer serbisu todan sira ne’e la bele ona no hamrik kleur iha loron matan sente nia ulun moras loos, lezadu agora dadaun ne’e seidak pronto simu arguidu no la perdua arguidu ninia hahalok.

Testemuña BA hanesan sira nia aman depoimenta katak antes ne’e testemuña diskute malu ho arguidu kona-ba testemuña hatete ba arguidu katak kamii ne’e ita bo’ot bele ba faan maibé ó nia inan mai husi Dili mak ita ba faan, tuir mai lezadu rona arguidu ho testemuña diskute malu, lezadu bolu arguidu no hatete katak “*ó fó kamii ne’e ba apa, se lae ó sai husi uma ne’e*”, arguidu hatan katak hau bele sai husi uma maibé imi selu hau nia karau no osan.

Testemuña depoimenta katak hafoin sira diskuti malu komesa dudu malu no arguidu hasai katana iha nia kalilin direitamente taa iha lezadu nia reen-toos, ulun parte loos, liman parte loos, no ain kelen parte loos.

Testemuña depoimenta tan katak depoisde taa hotu lezadu halai ba uma laran no testemuña ba hadau katana husi arguidu ninia liman.

Alegasaun finál

Prokuradór haktuir katak mezmú arguidu hili direitu nonook, maibé parte seluk lezadu kontinua konfirma faktu hotu iha akuzasaun no reforsa husi testemuña, prokuradór haree katak akuzasaun ne’e provadu no presidente, tanba ne’e husu ba tribunál kondena arguidu ba krime tentativa omisídiu simples ho pena prizaun tinan sanolu, ba krime armas brankas tinan neen, pena rua ne’e husu ba tribunál atu aplika pena unika tinan ualu prizaun.

Entretantu defeza husu ba tribunál atu kondena arguidu tuir konvikasaun tribunál nian

Desizaun

Depoisde avalia faktu hotu, tribunál julga akuzasaun ne'e provadu hotu katak arguidu komete krime hirak ne'e hasoru lezadu.

Bazeia ba faktu provadu sira ne'e no tetu mós sirkuntansia hotu-hotu haleu krime ne'e tribunál konklui prosesu ne'e no kondena arguidu ba krime tentativa omisídiu tinan hitu, enkuantu ba krime arma brankas tinan tolu, nune'e tribunál konklui ba krime rua ne'e aplika pena unika tinan neen ba arguidu.

4. Krime danu agravadu

Nú.Prosesu : 0045/15. CVSUI
Kompozisaun Tribunál : Koletivu
Juis : Dra. Patricia de Araujo F. B. M. Xavier, Dr. Samuel da Costa Pacheco no Dr. Eusébio Xavier Victor
Prokuradór : Dr. Rafael Jeronimo Gusmão
Defeza : Dr. Albino de Jesus Pereira
Desizaun : Absolve

Iha 09 Novembru 2021, Tribunál Distritál Suai prezide julgamentu leitura akordaun ba krime danu agravadu ne'ebé envolve arguidu Romario do Carmo da Silva no Jaimito Gery de Sena Amaral hasoru Estadu RDTL, iha Munisípiu Covalima.

Akuzasaun prokuradór

Prokuradór akuza katak iha 23 Jullu 2015, iha oras tuku 19:00 kalan, arguidu nain rua kaer fatuk hodi tuda rahun vidru Eskola Publika EBF Wemetan nian no lori vidru sira seluk ba baku rahun iha rate laran.

Prokuradór akuza arguidu sira kontra artigu 259 KP kona-ba danu agravadu ho moldura penál tinan 2 to'o tinan 8.

Produsaun ba prova sira

Iha prosesu julgamentu arguidu Romario deklarata katak iha akontesimentu ne'e ho Sr. Jaimito tuda manu mak kona fali vidru eskola nian.

Arguidu deklarata katak laos Jaimito arguidu ne'e maibé Jaimeto ida seluk ema same nian ne'e no arguidu rasik lahatene Jaimeto ninia paradeiro.

Arguidu Jaimeto nia deklarasaun deklarata katak momentu polisia ba kaer arguidu ne'e kaer sala ema tanba naran mak hanesan. Arguidu haktuir katak la iha kuñesimentu kona-ba kazu ne'e.

Testemuña Fernando Moniz hanesan kordenadoor eskola, depoimenta katak momentu akontesimentu ne'e iha hela ninia uma maibé lokraik hetan kontaktu hjusi diretór eskola katak ema tuda rahun eskola nia vidru rua, nune'e testemuña ba iha fatin akontesimentu no haree vidru rua rahun ne'e, testemuña depoimenta katak la kuñese ema ne'ebé tuda rahun vidru ne'e maibé rona husi diretór katak arguidu Romerio no Jaimeto mak halo rahun.

Testemuña Silvino Barros depoimeta katak iha akontesimentu iha loraik testemuña haree Sr. Jaimeto no Romario mak iha eskola refere no haree Jaimeto mak tuda maibé la haree arguidu

Romario, testemuña depoimenta katak laos Jaimeto arguidu ne'e maibé Jaimeto ida seluk ne'ebé agora dadaun lahatene ninia paradeiro.

Alegasaun final

Prokuradór haktuir katak lori arguidu mai iha julgamentu ne'e tanba arguidu sira komete krime danu agravadu, maibé iha produsaun ba prova rona arguidu katak Romario hatete katak momentu ne'e ho Jaimeto iha eskola tuda manu la kona mak fatuk ba kona janela eskola nian no deklarala laos Jaimeto agora dadaun sai arguidu ne'e maibé Jaimeto seluk, enkuantu arguidu Jaimeto la iha kuñesimentu ba kazu ne'e, parte seluk rona testemuña Fernandu Moniz katak la iha kuñesimentu ba kazu ne'e maibé rona tutan hosi diretór eskola, testemuña Silvino mós deklarala katak laos arguidu Jaimeto maibé Jaimeto ida seluk no laharee arguidu Romario mak tuda. Ho deklarasaun sira produs iha julgamentu, prokuradór husu ba tribunál fó justisa ba arguidu sira.

Entretantu defeza haktuir katak iha produsaun ba prova arguidu nain rua deklarala katak laos sira mak tuda maibé jaimeto ida seluk ne'ebé lahatene ninia paradeiru, rona fali testemuña katak rona tutan hosi diretór eskola no testemuña ida seluk hatete katak Jaimeto mak tuda maibé laos Jaimeto arguidu ne'e no la haree arguidu Romario mak tuda, ho nune'e husu ba tribunál absolve arguidu nain rua.

Desizaun

Depoisde avalia faktu hotu, tribunál julga akuzasaun ne'e la provadu hotu tanba momentu ne'eba ne'e laos arguidu sira mak halo rahun maibé ema deskonesidu. Tanba ne'e tribunál konklui absolve arguidu nain rua husi krime ne'e.

5. krime reseptasaun simples no kontrabandu

Nú.Prosesu	: 0010/21. CVSLL
Kompozisaun Tribunál	: Koletivu
Juis	: Dr. Naason Mário Armindo Marques Doutel, Dr. Benjamin Barros no Dr. Jose Maria Araujo
Prokuradór	: Dr. Rafael Jeronimo Gusmão
Defeza	: Dr. Angelmo Pinto
Desizaun	: Pena prizaun fulan neen suspende ba tinan ida, pena prizaun tinan rua suspende ba tinan rua

Iha 11 Novembru 2021, Tribunál Distritál Suai prezide julgamentu leitura akordaun ba krime reseptasaun agravada envolve arguidu/a Janeiro de Araújo, Desi Delfina Nunes no Olandina Cardozo hasoru Estadu RDTL, iha Munisípiu Covalima.

Akuzasaun prokuradór

Prokuradór akuza katak iha 06 Marsu 2021, iha oras tuku 17:00 lokraik, sasin Marito dos Santos hanesan komadante PNTL Eskuadra Tilomar, simu informasaun husi comunidade UPF Bravo Casabauc katak, arguidu Januariu de Araújo hatama ilegalmente tabaku Shan liuhusi tasi ho ró. Bainhira simu tiha informasaun, sasin Marito dos Santos ho nia membru ba kedas iha arguidu Januariu ninia uma hodi husu tuir kona-ba tabaku ne'e maibé arguidu Janeiro de Araújo nega

katak tabaku la faan iha ninia kioske, maske nune'e sasin Marito dos Santos husu tan ba dala rua mak foin arguidu tama ba uma laran hodi foti tabaku Shan bal lima iha karun mutin ida lori sai mai iha liur.

Tuir mai loron no fulan la apura maibe iha tinan 2021, arguida Desi mak lori tabaku shan ball haat ba faan iha arguida Olandina Cardozo ninia kioske.

Tuir mai PNTL haree no dektekta katak tabaku shan ne'e la iha estiker, nune'e polisia sira lori arguidu ba iha eskuadra no submete ba investigasaun.

Arguidu sira hatene katak faan sasan ilegalmente ne'e lei bandu maibe arguidu sira kontinua faan sasan illegal sira.

Prokurador akuza arguidu kontra artigu 271 KP kona-ba reseptasaun simples ho moldura penal tinan 2 to'o tinan 8 no artigu 316 KP kona-ba kontrabandu ho moldura penal tinan 2 to'o tinan 6 ka multa.

Produsaun ba prova sira

Iha julgamentu arguidu Janeiro de Araujo deklara katak faktu balun loos no balun la loos, arguidu haktuir katak faktu loos mak arguidu faan tabaku Shan ne'e faan duni iha ninia kioske, maibe tabaku ne'e arguida Desi Delfina Nunes nian. Arguidu deklara katak faktu laa loos mak arguidu mak hatama tabaku shan ne'e ilegalmente liuhusi ro. Arguidu deklara katak foin mak mai hatan iha tribunál.

Arguida Olandina hili direitu nonok.

Arguida Desi Delfina Nunes nia deklarasaun deklara katak momentu ne'e loke ninia kioske iha Mota Masin maibe durante ne'e estadu Timor-Leste aplika serka sanitaria nune'e ninia kioske ema la sosa ona tanba ne'e tabaku shan ne'e lori ba fo arguidu Janeiro mak faan iha ninia kioske, arguida reforsa arguidu Janeiro nian katak tabaku ne'e arguida mak lori ba arguidu sira faan, maibe laos arguidu sira mak hatama ilegalmente. Arguida deklara tan katak tabaku shan ne'e sosa iha kioske arumi no Goronto ninia kioske. Arguida deklara tan katak nunka hatama sasan ilegalmente, no deklara katak foin primeiraves mai hatan iha tribunál.

Alegasaun final

Prokurador haktuir katak arguidu sira provadu komete krime reseptasaun agravada hasoru estadu RDTL, arguidu sira nia hahalok ne'e fo prejuizu ba estadu rasik hakarak subar sasan illegal sira. Bazeia ba faktu provadu sira ne'e husu ba tribunál atu kondena arguidu nain tolu pena prizaun tinan rua suspende ba tinan tolu.

Enkuantu defeza haktuir katak, husu ba tribunál atu decide tuir konviksaun tribunál.

Desizaun

Tribunál koletivu halo alterasaun ba krime reseptasaun agravada ba fali reseptasaun simples ba arguidu/a Olandina Cardoso no Janeiro de Araujo, enkuantu ba arguida Desi Delfina Nunes reseptasaun agravada altera ba fali kontrabandu, ba tribunál nia alterasaun ne'e prokurador no defeza la iha opsau.

Tribunál prova katak arguidu/a Januario no Olandina faan sasan illegal iha sira nia kioske entretantu ba arguidu Desi Delfina Nunes tribunál prova katak arguida hatama sasan ilegalmente liuhusi Mota Masin.

Bazeia ba faktu provadu hirak ne'e no tetu mós sirkunstánsia hotu-hotu haleu krime, tanba ne'e tribunál konklui kondena arguida/u nain tolu ba arguidu/a Januario no Olandina kondena pena prizaun fulan neen suspende ba tinan ida, ba arguida Desi kondena pena prizaun tinan rua suspende ba tinan rua no objektu aprendidu afavor ba estadu.

6. Krime kontrabandu

Nú. Prosesu : 0181/19.BBMLV
Kompozisaun Tribunál : Koletivu
Juis : Dr. Benjamin Barros, Dr. Jose Maria Araujo no Dr. Naason Mário Armindo Marques Doutel
Prokuradór : Dr. José Elo
Defeza : Dr. Manuel Amaral
Desizaun : Pena Prizaun tinan 2 suspende ba tinan 2 no selu kusta Judisial US\$ 25.00.

Iha 24 Novembru 2021, Tribunál Distritál Suai liuhusi julgamentu movel iha Munisípiu Bobonaro, prezide julgamentu leitura akordaun ba krime kontrabandu ne'ebé envolve arguida Flaviana de Jesus hasoru Estadu RDTL, iha Munisípiu Bobonaro.

Akuzasaun prokuradór

Prokuradór akuza katak iha 02 Abril 2020, iha oras tuku 10:30, arguida telefone ba Sra. Eda iha mota sorin no haruka importa minarai 525 litrus. Sra Eda mós konkorda no iha kalan ne'e lalin minarai ne'e tau iha mota ain, tuir mai arguida ba hasoru Sra. Eda no entrega osan ho total US\$320.00.

Tuir mai arguida lalin minarai sira ne'e ba iha kareta no atu lori ba iha ninia uma, maibé to'o iha dalan klaran Unidade Polísia Fronteira (UPF) hapara tiha kareta ne'e no prende objetu ne'ebé lezada tula no tuir mai lori arguida ba iha edifisiu UPF no submete ba iha investigasaun, tanba arguida nia hahalok ne'e fó prejuizu ba Estadu RDTL.

Prokuradór akuza arguida kontra artigu 316 KP kona-ba kontrabandu ho moldura penál tinan 2 to'o tinan 6 ka multa.

Produsaun ba prova sira

Iha prosesu julgamentu arguida konfesa integralmente ba faktu hotu iha akuzasaun, arguida deklarata katak foin mai hatan iha tribunál, promete sei la repete ninia hahalok ne'e iha futuru.

Alegasaun finál

Prokuradór haktuir katak aguida ninia hahalok ne'e priense krime kontrabandu tuir artigu 316 KP. Prokuradór haree katak krime kontrabandu ne'e aas tebes iha aráa fronteira sira, tanba ne'e

atu prevene futuru arguida atu labele repete ninia hahalok, husu ba tribunál atu kondena arguida pena prizaun tinan rua suspende ba tinan tolu, enkuantu objektu aprendidu a favor ba estadu.

Entretantu defeza husu ba tribunál atu aplika pena suspensaun ne'ebé kmaan ba arguida.

Desizaun

Depoisde avalia faktu hotu, tribunál prova katak arguida komete krime kontrabandu hasoru Estadu RDTL.

Bazeia ba faktu provadu sira ne'e no tetu mós sirkuntansia atenuante sira hanesan arguida foin primeiravés mai hatan iha tribunál, arrepende ninia hahalok no promete sei larepete ninia hahalok iha futuru. Tanba ne'e tribunál konklui prosesu ne'e no kondena arguida ho pena prizaun tinan rua suspende ba tinan rua no objektu aprendidu a favor ba estadau no kondena arguida selu kustu judisiál US\$25.00.

7. Kazu sivíl regulasaun ba ezersísiu podér paternál

Nú. Prosesu	: 0048/19 CVTDS
Kompozisaun Tribunál	: Singulár
Juis	: Dr. Jose Maria Araujo
Prokuradór	: Dr. José Elo
Defeza	: Dr. Manuel Amaral
Desizaun	: Omologa akordu

Iha 25 Novembru 2021, Tribunál Distritál Suai liuhusi julgamentu movel iha Munisípiu Bobonaro, prezide julgamentu tentativa konsiliaun ba kazu regulasaun ezersísiu podér paternál, ne'ebé envolve autór JR ho idade (tinan3) hasoru rekeridu CRH no rekerida DS (nu'udar inan no aman), iha Munisípiu Covalima.

Termu no fundamentu sira

Iha 2020, rekeridu sai husi uma la fó hatene ba rekerida, liu semana ida hanesan ne'e rekerida rona informasaun husi nia tiu katak rekeridu hola feto ki'ik ona, prokuradór representa menór hatama asaun ne'e hodi kontra rekeridu atu fó alimentasaun ba menór no tau matan ba menór ninia nesesidade baziku.

Kazu ne'e relaciona ho ezersísiu podér paternál tuir artigu 1757, 1758 (1), 1759, 1762, 1765, 1786, 1787(2), 1782, 1804 no 1805 KS, kona-ba responsabilidade inan-aman ba menór sira.

Tentativa konsiliaun

Rekeridu no rekerida konkorda menór sira hela ho rekerida inan, rekeridu sei ba vizita menór Sabadu no Domingu, loron boot sira Natal Tinan foun rekeridu bele lori menór ba ninia uma hodi selebra Natal no Tinan foun, rekeridu kada fulan ida sei fó alimentasaun ba menór US\$ 25.00, osan refere sei manda liuhusi rekerida ninia konta bankaria.

Alegasaun finál

Prokuradór representa menor no defeza husu ba tribunál atu omologa akordu ne'ebé rekeridu no rekerida konkorda hamutuk atu tau matan ba menor.

Desizaun

Tribunál bazeia ba rekeridu no rekerida ninia akordu ne'ebé sira rua konkorda hamutuk no omologa akordu ne'e.

8. Krime pratika arte marsiais

Nú.Prosesu : 0051/19.BBATB
Kompzisaun Tribunál : Singulár
Juis : Dr. Naason Mário Armindo Marques Doutel
Prokuradór : Dr. José Elo
Defeza : Dr. Fransisco Caitanho Martins
Desizaun : Pena prizaun fulan 3 suspende ba tinan 1

Iha 25 Novembru 2021, Tribunál Distritál Suai liuhusi julgamentu movel iha Munisípiu Bobonaro, prezide julgamentu leitura sentensa ba krime pratika arte marsiais ne'ebé envolve arguidu Julio Gusmão, Juvito Souza Quintiliano Pereira, Natalino de Jesus Pereira, Valentino Pires, Maxi Maria da Cruz no Ronaldo Visente Pereira hasoru Estadu RDTL, iha Munisípiu Bobonaro.

Akuzasaun prokuradór

Prokuradór akuza katak iha 21 Setembru 2019, iha oras tuku 08:00 kalan, arguidu Julio Gusmão uza atributu arte marsiais PSHT no fó treinu hela ba arguidu sira seluk hanesan Juvito Souza Quintiliano Pereira, Natalino de Jesus Pereira, Valentinho Pires, Maxi Maria da Cruz no Ronaldo Visente Pereira iha Aldeia atabae. Banhira arguidu sira treinu hela Polisia UPF hetan no kaer arguidu sira no lori arguidu sira submete ba iha investigasaun.

Arguidu sira hatene katak lei bandu arte marsiais sira hanesan PSHT, KORKA no KERA SAKTI maibé sira treinu subar nafatin.

Prokuradór akuza arguidu kontra artigu 2 nu 1 letra (f) no Artigu 20 husi Lei Nú 5/2017 kona-ba arte marsiais.

Produsaun ba prova sira

Iha prosesu julgamentu arguidu sira hili direitu nonook.

Alegasaun final

Prokuradór haktuir katak mezmú arguidu sira hili direitu nonook, maibé prokuraór husu ba tribunál atu konsidera faktu sira produs iha inkeritu nia laran. Nune'e husu ba tribunál atu kondena arguidu sira ba pena prizaun tinan ida suspende ba tinan ida. Entretantu defeza husu ba tribunál atu kondena arguidu tuir konviksaun tribunál nian.

Desizaun

Depoisde avalia faktu hotu, tribunál prova katak faktu hotu, tanba ne'e tribunál konklui prosesu ne'e kondena arguidu sira ho pena prizaun fulan tolu suspende ba tinan ida.

9. Krime ofensa ba integridade fizika simples ho natureza violénsia doméstika

Nú.Prosesu : 0020/21.BBCLC
Kompzisaun Tribunál : Singulár
Juis : Dr. Naason Mário Armindo Marques Doutel
Prokuradór : Dr. Nelson Jose Soares Magno
Defeza : Dr. Francisco Caetano Martins
Desizaun : Pena prizaun fulan tolu suspende ba tinan ida

Iha 25 Novembru 2021, Tribunál Distritál Suai liuhusi julgamentu movel iha Munisípiu Bobonaro, prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu JAA hasoru lezada nu'udar nia feen, iha Munisípiu Bobonaro.

Akuzasaun prokuradór

Prokuradór akuza katak iha 24 Abril 2021, iha oras tuku 10:00 dadeer, arguidu tuku dala ida iha lezada nia ulun, rasta lezada nia fuuk riba lezada ba rai no kontinua sama lezada dala rua. Antes agresaun ne'e, arguidu ho lezada diskute malu kona-ba arguidu deskonfia lezada amante (*selingkuh*) ho mane seluk, nune'e arguidu komete aktu hirak ne'e.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, 3 (a), 35 (b) no 36 LKVD

Produsaun ba prova sira.

Iha prosesu julgamentu arguidu hili nia direitu nonook. Entretantu lezada kontinua konfirma faktu hotu iha akuzasaun no deklarata katak depoisde akontesimentu liu semana ida mak foin diak malu fali, lezada hatutan katak arguidu husu ona deskulpa ba lezada no labaku lezada.

Alegasaun finál

Prokuradór haktuir katak mezmu arguidu hili direitu nonook maibé lezada kontinua konfirma faktu sira ne'ebé konsta ona iha autus laran, prokuradór fiar katak arguidu komete krime hirak ne'e hasoru lezada, krime violénsia doméstika mós aas tebes iha Munisipiu bobonaro nune'e atu prevene repete tan ninia hahalok ne'e iha futuru, husu ba tribunál atu kondena arguidu ho pena prizaun tinan ida suspende ba tinan ida.

Entretantu defeza haktuir katak husu ba tribunál atu kondena arguidu ho pena mais adekuaadu.

Desizaun

Depoisde avalia faktu hotu, tribunál prova katak arguidu tuku dala ida iha lezada nia ulun, rasta lezada nia fuuk riba lezada ba rai no kontinua sama lezada dala rua.

Bazeia ba faktu provadu hirak ne'e no tetu mós ho sirkunstánsia sira hotu ne'ebé haleu krime ne'e no kondena arguidu ho pena prizaun fulan tolu suspende ba tinan ida.

10. Krime ofensa integridade fizika simples ho natureza violénsia doméstika

Nú.Prosesu : 0234/20.BBMLV
Kompozisaun Tribunál : Singulár
Juis : Dr. Benjamin Barros
Prokuradór : Dr. José Elo
Defeza : Dr. Manuel Amaral
Desizaun : Pena prizaun fulan 6 suspende ba tinan 1

Iha 25 Novembru 2021, Tribunál Distritál Suai liuhusi julgamentu movel iha Munisípiu Bobonaro, prezide julgamentu leitura sentensa ba krime ofensa ba integridade fizika simples ho naturja violénsia doméstika ne'ebé envolve arguidu LG hasoru nia feen, iha Munisípiu Boboanaro.

Akuzasaun prokuradór

Prokuradór akuza katak iha 30 Feveireiru 2021, oras tuku 12:00 meiudia, arguidu tebe dala ida lezada nia kotuk laran, basa dala rua hasan parte karuk no tuku dala ida iha ulun rezulta moras no bubu. Antes agresaun hirak ne'e, arguidu ho lezada diskute malu kona-ba bainhira arguidu ho fila husi to'os lezada la prepara hahan.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, 3 (a), 35 (b) no 36 LKVD

Produsaun ba prova sira

Iha julgamentu arguidu hili direitu nonook. Iha parte seluk lezada kontinua konfirma faktu hotu iha akuzasaun no deklar katak depoisde akontesimentu kalan ne'e diak malu kedas ho lezada, to'o ohin loron arguidu labaku ona lezada.

Alegasaun finál

Prokuradór haktuir katak mezmu arguidu hili direitu nonook, maibé lezada kontinua konfirma faktu hotu iha akuzasaun, prokuradór fiar katak krime ne'e akontese duni hasoru lezada, tanba ne'e atu prevene krime ne'e akontese tan iha futuru husu ba tribunál atu kondena arguidu ho pena prizaun fulan neen suspende ba tinan ida.

Entretantu defeza husu ba tribunál atu kondena arguidu ho pena ne'ebé kmaan.

Desizaun

Depoisde avalia faktu hotu, tribunál prova katak arguidu tebe dala ida lezada nia kotuk laran, basa dala rua hasan parte karuk no tuku dala ida iha ulun rezulta moras no bubu.

Bazeia ba faktu provadu ne'e tetu mós sirkunstánsia hotu-hotu haleu krime ne'e, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

11. Krime danu simples no ameasa

Nú.Prosesu : 0191/20.BBMLV

Kompozisaun Tribunál : Singular
Juis : Dr. Benjamin Barros
Prokuradór : Dr. José Elo
Defeza : Dr. Manuel Amaral
Desizaun : Omologa dezisténsia keixa

Iha 25 Novembru 2021, Tribunál Distritál Suai liuhusi julgamentu movel iha Munisípiu Bobonaro prezide julgamentu tentativa konsiliausaun ba krime danu simples no krime ameasa ne'ebé envolve arguidu Conastrel Roberto Carlos A. Martins no Romeu da Silva hasoru lezada Wulan Ariyati no lezada Celina Soce, iha Munisípiu Bobonaro.

Akuzasaun prokuradór

Prokuradór akuza katak iha 01 Novembru 2020, iha oras tuku 12:00 meiodia, arguidu nain rua ba iha lezada sira nia uma no ba estraga lezada Selina nia Baraka no foti tudik ameasa lezada Wulan Ariyati katak “*ó nia laen la mai hau oho tiha ó*”. antes ne'e lezada ninia laen sira mak ba baku uluk arguidu sira nia alin, nune'e arguidu sira komete krime ne'e hasoru lezada sira.

Prokuradór akuza arguidu nain rua kontra artigu 258 KP kona-ba danu simples ho muldura penál tinan 3 ka multa no artigu 157 KP kona-ba ameasa ho moldura penál tinan 2 ka multa.

Produsaun ba prova sira

Bazeia ba artigu 262 KPP kona-ba tentativa ba konsiliausaun, nune'e antes tama ba julgamentu produsaun ba prova, juis husu atu halo tentativa konsiliausaun ba arguidu ho lezada.

Iha prosesu tentativa konsiliausaun ne'e lezada Wulan Ariyati lahatene tetun, nune'e tribunál buka tradutor maibé la iha tanba ne'e juis rasik konversa lezada ne'e ho lian Indonezia.

Iha prosesu tentativa konsiliausaun ne'e, lezada nain rua hakarak deziste ninia keixa hasoru arguidu nain rua maibé husu ba arguidu nain rua atu labele repete ninia hahalok. Arguidu simu pedidu husi lezada nain rua no promete sei larepete ninia hahalok ne'e hasoru lezada nain rua no ema seluk.

Alegasaun finál

Prokuradór apresia akordu dame ne'ebé parte rua decide ona no husu ba tribunál atu omologa prosesu ne'e.

Alende ne'e defeza mós konkorda akordo ne'ebé parte rua decide ona no husu ba tribunál omologa prosesu ne'e no absolve arguidu nain rua husi krime ne'e.

Desizaun

Bazeia ba akordu dame husi parte rua no pedidu dezisténsia husi lezada, tribunál konklui prosesu ne'e no omologa akordu dame no absolve arguidu nain rua husi krime ne'e.

12. Krime ofensa ba integridade fizika simple ho natureja violénsia doméstika

Nú Prosesu : 0109/20.BBMLV

Kompzisaun Tribunál : Singular
Juis : Dr. Benjamin Barros
Prokuradór : Dr. Nelson J.S. Magno
Defeza : Dr. Fransisco Caitanho Martins
Desizaun : Pena multa US\$60.00

Iha 26 Novembru 2021, Tribunál Distritál Suai liu hosi julgamentu movel iha Munisípi Bobonaro, prezide julgamentu leitura sentensa ba krime ofensa ba integridade fizika simples ho natureja violénsia doméstika ne'ebé envolve arguida IdJ hasoru lezadu JP, iha Munisípiu Bobonaro.

Akuzasaun prokuradór

Prokuradór akuza katak iha 24 Jullu 2020, iha oras tuku 8:00 dadeer, arguidu tuku dala tolu iha lezadu nia ulun. Antes agresaun ne'e, arguida ho lezadu diskute malu kona-ba lezadu ba foti uluk osan iha Banku BNU no bainhira arguida atu ba foti osan la iha ona, nune'e arguida komete agrasaun hirak ne'e hasoru lezadu.

Prokuradór akuza arguidu kontra artigu 145 KP kona-ba ofensa ba integridade fizika simples ho moldura penál tinan 3 ka multa konjuga ho artigu 2, 3 (a), 35 (b) no 36 LKVD.

Produsaun ba prova sira

Iha julgamentu arguida konfesa faktu hotu iha akuzasaun no deklarata katak depois liu tiha fulan ida mak arguida buka lezadu no diak malu kedan, arguida foin mai hatan iha tribunál promete sei larepete ninia hahalok ne'e hasoru lezadu no ema seluk iha futuro.

Alende ne'e lezadu kontinua konfirma faktu hotu iha akuzasaun no reforsa arguida nia deklarasaun katak depoisde akontesimentu liu fulan ida mak di'ak malu fali, arguida agora labaku ona lezadu.

Alegasaun finál

Prokuradór haktuir katak arguida provadu prosidente tuir faktu iha akuzasaun ne'ebé tuir konfiksaun arguida nian no konfirma mós husi lezadu, prokuradór haree katak kazu violénsia doméstika aas tebes iha área juridisau tribunál Suai, nune'e husu ba tribunál atu kondena arguida ho pena prizaun fulan tolu suspende ba tinan ida.

Entretantu defeza husu ba tribunál fó justisa ba arguidu tuir konviksaun tribunál nian.

Desizaun

Depoisde avalia faktu hotu, tribunál prova katak arguida tuku dala tolu iha lezadu nia ulun. Bazeia ba faktu provadu sira ne'e no tetu mós sirkunstánsia atenuante sira hanesan arguida foin primeiravés mai hatan iha tribunál, arrepende nia hahalok no promete sei la repete hahalok ne'e iha futuro. Tanba ne'e tribunál konklui prosesu ne'e no kondena arguida ho pena multa US\$ 60.00, ne'ebe arguida sei selu US\$1.00 kada loron, durante loron 60. Tribunál mós fiksa pena alternativa durante loron 40 prizaun, bainhira arguida la selu pena multa refere.

13. Krime maus-tratus ba kónjuje ho natureza violénsia doméstika

Nú.Prosesu : 0128/19.PDSUA
Kompozisaun Tribunál : Koletivu
Juis : Dr. Benjamin Barros, Dr. Jose Maria Araujo no Dr. Naason
Mário Armindo Marques Doutel
Prokuradór : Dr. José Elo
Defeza : Dr. Domingos dos Santos
Desizaun : Pena prizaun tinan 2 suspende ba tinan 2

Iha 30 Novembru 2021, Tribunál Distritál Suai prezide julgamentu leitura akordaun ba krime maus-tratus ba kónjuje ho natureza violénsia doméstika ne'ebé envolve arguidu RdS hasoru lezada nu'udar nia eis feen, iha Munisípiu Covalima.

Akuzasaun prokuradór

Prokuradór akuza katak loron no fulan la apura maibé iha tinan 2017, iha oras tuku 15:00 lokraik arguidu basa dala ida lezada nia hasan parte karuk. Antes agresaun ne'e arguidu deskonfia lezada amante (*selingkuh*) ho mane seluk, nune'e arguidu komete krime ne'e hasoru lezada.

Tuir mai iha fulan Agostu 2017, iha oras tuku 12:00, meiodia, arguidu basa dala rua iha lezada nia hasan parte sorin loos no tebe dala ida nia ain kabun parte loos rezulta moras, antes agresaun ne'e lezada toba dukur hela iha sira nia kuartu laran, arguidu tama ba fanu lezada no hatete ba lezada "*ó amante ho mane seluk*", maibé lezada hatan katak hau la amante ho mane seluk, nune'e mosu agreasaun refere.

Tuir mai iha 07 Setembru 2019, iha oras tuku 13:00 meiodia, arguidu tuku dala tolu iha lezada nia kotuk laran, basa dala ida iha lezada nia hasan parte karuk, tebe dala ida iha lezada nia kabun no tuku dala haat iha lezada nia orgaun seksuál, rezulta moras no halo lezada desmaia. Antes agresaun ne'e, arguidu ho lezada diskte malu kona-ba lezada ho nia primu sae motor no hasoru malu arguidu iha dalan, nune'e arguidu komete krime hirak ne'e hasoru lezada.

Tuir mai iha 11 Setembru 2019, iha oras la apura, arguidu tuku dala ida iha lezada nia reen-toos, kaer lezada nia fuuk no tuku dala barak iha lezada nia orgaun seksuál, antes problema hirak ne'e lezada tein hela iha dapur derepente arguidu tama ba dapur laran husu lezada "*ó amante ho mane seluk*" maibé lezada hatan katak hau nunka amante ho mane seluk, nune'e arguidu komete krime hirak ne'e hasoru lezada.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6 prizaun, konjuga ho artigu 2, 3(a), 35(a) no 36 LKVD.

Produsaun ba prova sira

Iha prosesu julgamentu arguidu hili direitu nonook. Enkuantu lezada kontinua konfirma faktu hotu iha akuzasaun no deklarata katak perdua arguidu nia hahalok, maibé atu fila ba arguidu lezada lakohi, lezada deklarata tan katak la ba halo tratamentu iha ospital maibé sosa aimoruk hemu iha uma de'it, lezada haktuir katak vajina moras ne'e lezada nia alin mak uza bé morna kose de'it. Lezada haktuir tan katak parte família rua hodi tuur hamutuk rezolve maibé la iha solusaun ikus sira separadu.

Testemuña DA hanesan sira nia viziño, depoimenta katak momentu akontesimentu iha 16 Outubru 2019, iha oras tuku 6:00 dadeer, lezada tanis no hakilar iha arguidu ho lezada ninia uma, testemuña depoimenta tan katak depoisde akontesimentu ne'e la husu tuir kona-ba lezada tanis no hakilar ne'e. Testemuña depoimenta tan katak kona-ba problema sira seluk testemuña la iha kuñesimentu.

Testemuña DM depoimenta katak hanesan infermeiru iha Sentru Saúde Tilomar. Testemuña depoimenta katak la iha relasaun família ho arguidu.

Testemuña depoimenta katak momentu arguidu ho ninia inan aman ba iha sentru saúde atu konsulta ninia tilun ne'ebé diuk, bainhira arguidu to'o iha sentru saúde testemuña halo ezaminasaun ba arguidu dektekta katak arguidu iha ona difisensia psikologika ne'ebé seidak grave liu, tanba ne'e testemuña haruka ninia inan aman atu fó konselu ba arguidu durante fulan neen, depoisde ida ne'e lori fali arguidu ba iha sentru saúde hodi tuir tratamentu ba segundu nia atu konsumu aimoruk.

Testemuña GdF hanesan lezada ninia alin fetu, depoimenta katak momentu akontesimentu iha 2019, kalan lezada tanis no halai ba iha testemuña ninia uma, nune'e testemuña husu tuir lezada, alende ne'e lezada informa ba testemuña katak arguidu tuku iha lezada ninia orgaun seksuál to'o bubu no tuku iha kotuk laran dala barak rezulta metan no bubu, testemuña depoimenta katak bubu iha lezada ninia orgaun seksuál no kotuk laran testemuña haree duni tanba lezada hatudu.

Testemuña depoimenta tan katak kona-ba kazu akontesimentu sira seluk testemuña la iha kuñesimentu.

Testemuña JEdA hanesan arguidu nia alin fetu, depoimenta katak kona-ba arguidu ho lezada ninia problema ne'e la iha kuñesimentu tanba momentu ba eskola ona iha Suai Villa, testemuña haktuir katak arguidu desde seidak hola fetu ne'e ninia tilun diuk oituan ona, testemuña haktuir katak arguidu tuur mesak ne'e hamnasa mesa-mesak de'it.

Alegasaun final

Prokurador haktuir katak mezmu arguidu hili direitu nonook, maibé lezada kontinua konfirma faktu hotu iha akuzasaun tanba ne'e prokurador fiar katak arguidu komete krime hirak ne'e hasoru lezada, tanba ne'e husu ba tribunál atu kondena arguidu ho pena prizaun tinan rua suspende ba tinan tolu.

enkuantu defeza haktuir katak arguidu hili direitu nonook, maibé lezada kontinua konfirma faktu hotu iha akuzasaun, entretantu defeza fiar ba testemuña peritu ninia ezaminasaun ba arguidu katak arguidu iha ona difisiénsia anomalia psikika, tanba ne'e husu ba tribunál atu deside tuir konviksaun tribunál nian.

Desizaun

Depoisde avalia faktu hotu, tribunál prova katak arguidu provadu komete krime hasoru lezada, bazeia ba faktu provadu hirak ne'e no tetu mós ho sirkunstánsia atenuante sira tribunál konklui prosesu ne'e no kondena arguidu ho pena prizaun tinan rua suspende ba tinan rua.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: ana@jsmp.tl

info@jsmp.tl

Website: <http://jsmp.tl>